

ACAAM CCAA.

Acaam ccaa quiij ziic quisil iha. Ziic tiquij iiselca itacl tintica hax mooscl oo. Iisax iize com hax mooxp oo.


Acaam ccaa tiquij, ziic ziix zo quihit áa z imhaa ha. Ziix quih isiihit ta x, hehe quih istj quih cacat quih imiihit. Hehe is quih cacat quih mos imiihit. Hax quih isiisi ta x, hasahcapjö quih ix quih imiisi. Hasahcapjö cop mos iif com cöitnip x, imiisi. Ziic tiquij hax quih mos quisi ha, xo hax cpaaisx, taax ipi z imasi ha. Tooaha cötajöc oo, hant com iti quihtim iha. Taax ah aa itah ma aama.

Hantx cömiha hac, xiica coosyatoj cmajiic coi zo haa, yoque. Hant z iti tiij, tooizj, toc cötiij ma, ziix hast iizx ano coom com mos cmiique quih thaa x, toc cöquij iha. Ox tpacta ma, haaizj quih hapaxi coox cah x itahit, toc cötiij ma, cmaam ical quiij ox itai, yoque. Ismahitim ta, itah, yoque. Ox itai ma, iisax theemt ma, onaaaj quih z itexl, yeen hac iti itjiit, yoque. Ox tpacta ma, iisax theemt, tfit, hehe án com iiqui tiin, yoque. Ox tpacta ma, taax ano cöititaai ma, hant haaco tama ma, cmaax ziix ccam ihmaa ticom thaa, hehe án com ano moom. Ziix hast iizx ano coom com ipnij án quiij hax imheeloj oo tax, taax



acaam ccaa

(TMV cöiyáaspoj iha.)



acaam ccaa

(CMM inol cöiyaaspoj iha.)

imam haaizj ihajiit tiquih it hant cöimetolca chaa, yoque. Taax oo cötpacta ma, hant haaco tama ma, cmaam tiquij, ziic acaam ccaa hapah quij imhaa. Ctam quij, tiix ziix hast iizx ano coom com imhaa. Ziic tiquij immah tax, cooha, yoque. [LHC]

(Troglodytes aedon, Thryomanes bewickii, Salpinctes obsoletus) [imazoj: acaam ccaat]